

ETUMBA



Ba-nzela na Ye ezali na bozindo koleka, boye te? Nkolo na bikamwa! Ezalaka mpenza malamau mingi kotiela Ye motema. Nandimisami mpenza ete bolekiyasi ntango malamau na mpokwa oyo. Mpe bobele kofungola ekuke kuna kala mingi te mpe koyoka Ndeko Gertie koyemba loyembo ya kala wana, *Kóba Kosimba Makasi, Kaka Ngonga Moko Lisusu*, ezongiseli ngai bikaniseli ya mwa losambo na ngai, ntango ezalaki kaka liboso nálongwa ntango mosusu wana mpo na kokende na bilanga ya mosala ya etinda. Nazali sikoyo kotala na “Luká Nzambe Liboso” awa, liboso na likonzi ya kala oyo, Nazoyeba lisusu ntango Sammy Davidson ayemaki yango kuna eleki pene na mbula ntuku mibale na mitano, na ngámbo mosusu, nakanisi ezali na: “Okolekisa Seko-na-Seko Wapi? Kanisá!” Mpe awa, ezalaki na—na “Mwasi Na Liziba Na Mai,” mpe, “Daniele Kati Na Libulu Na Bankosi.” Oh, la la! Makambo mingi esili koleka kobanda ntango wana.

² Penepene na ngonga ya mitano na nsima ya nzángá oyo nazuaki mbela moko ya lombangu oyo eutaki na ba-kilometre pene na ntuku minei na mwambe, ntuku motoba na minei na zamba awa, ya mwasi moko azalaki kobunda na liwa, mpe moninga ya motuya mpenza, mama ya Georgie Carter. Mpe nayebaki ete batei mingi bazalaki awa mpo na kokóba mosala kino nazóngaki. Edith mpe azalaki na mpasi makasi. Mpe wana tozalaki kuna, Nkolo Nzambe akotaki na mosala, mpe Ndeko mwasi Carter akomi mosika na kokufa. Boye, boye tozongisi matondi mpo na yango.

³ Mpe sikoyo ntango mpo na liyangani ya elámbo elingi kokóma kala mingi te, nakanisi ekozala pene na ngonga ya minuit ntango bakosala yango. Ntango nini nde bosili kobongisa mpo na kopesa yango? [Ndeko Neville alobi: “Ntango nyonso, kobanda sikawa, na ntango nyonso kino koleka ngonga ya zomi na moko na ndambo moké.”—Mok.] Kaka ntango nyonso oyo to. . . Bato boni bakolia elámbo na mpokwa oyo, tómona maboko na bino. Ezali, oh, ezali kitoko mingi. Malamau, nalingi koloba bobele liloba moko to mibale. Ntango mosusu nakotia sáa na ngai awa mpo na miniti zomi, zomi na mitano, tokobanda elámbo. Sikoyo, bolingaka Ye? [Losambo balobi: “Amen.”—Mok.] Amen. Mpe nayebi ete bolekiyasi ntango kitoko mpenza, boye te?

⁴ Ee, soki oyo mpenza Ndeko mobali Thomas Kidd te, ná Ndeko mwasi Kidd, kouta longwa na Ohio. Nabanzi ete batelemisaki bango. Oh, ezali malamau, nazulikya ete ezali na bande mpe nakozua yango. Boyebi, bango balembaka te. Bazali bobele na mwa mikolo na nsé ya mokáma, kasi—kasi

yango nde epésaka ngai mpiko, ezali komona bato ya ndenge wana. Bókanisa naino, nazali mobangé, mpe liboso nábotama, bazalaki koteya Nsango-malamu. Na bongo tala ngai oyo nakómi mobangé, mpe bango, soki bakoki kobima te mpo na koyokisa mongongo na bango, bango bazuaka bobele masini ya koyokisa bande, mpe bakendeke na lopitalo na lopitalo, ndako na ndako, mpo na koteya Nsango-malamu. Ezali malamau mpenza-mpenza. Amen. Nazali mpenza na esengo mpo na bango mpe mpo na baoyo nyonso bazalaki na mayangani oyo awa.

⁵ Sikoyo, bóbosana te, tokoyebisa yango sikoyo, soki Nkolo alingi, bobele ntango losambo ekosila, oyo bazali koloba ete ekozala pene na mokolo ya zomi na sánzá ya Mibale, boye, tozali, soki Nkolo alingi, tolingi kozua na moké mikolo mwambe to zomi, to ntango mosusu mposo mibale, likoló na *Bilembo Nsambo* wana ya Emoniseli. Mpe tokotinda bakaláti epai na bapaya na biso na zingázinga, longwa na engumba awa, mpe koyebisa bango liboso mpenza soki bazui likanisi ya koya, ee, tokozala na esengo ya kozala na bino awa. Mpe ntango mosusu Nkolo akopesa biso komonisama mosusu ya Bozali na Ye ndenge Asalaki mbala ya nsuka ntango tosilisaki ná *Bileko Nsambo Ya Lingomba*.

⁶ Soki bokolinga mpenza kobondela mpo na moto moko, boye, bókanisaka ngai ntango nyonso, mpo nazali ye oyo azali na bosenga na yango. Sikoyo, nazali komiyoka mwa nsóni, kozua kino miniti zomi, zomi na mitano awa, mpo na koloba mwa eloko moko liboso ete tóbanda, kasi tógúmba mitó na biso mwa moke.

⁷ Nkolo Yesu, oh, etumba ekosila mokolo moko, mpe ekozala lisusu na bato na malali te ya kobóndela mpo na bango, mpe ekozala lisusu na basumuki te mpo na kobongola motema. Kasi, Tata, wana mokolo oyo ezali oyo yango ezali, tika tósala wana tozali na pole ya kosala kati na yango, mpo ntango ekoya, wana moto moko akoki kosala mosala te. Sikoyo, kaka mpo na mwa ntango moke, Nkolo, nakomiyoka mabe soki nasalaki yango te, ete nasukisaki mbula oyo kozanga koloba mwa maloba. Sunga ngai, Tata, nabondeli, ete nákoka koloba eloko moko oyo ekopesa mpiko na motema ya bato na Yo, ete tókoka kolongwa awa na mpokwa oyo nsima na kolia elámbo, mpe tososoli ete kati na elámbo makasi ezali. Yisraele baliaki elámbo ya liboso kuna na Ejipito, mpe batambolaki mibu ntuku minei kozanga sapatu na bango kobéba to bilamba na bango kopasuka. Mpe, kati na bato milió mibale, ezalaki na moto moko te kati na bango ná bolembu ntango babimaki na lisobe. Nkolo, tika ete tómikanisela yango lisusu na mpokwa oyo wana tozali kobeleva na ngonga monene oyo. Na Nkombo na Yesu tobondeli. Amen.

⁸ Soki nasengelaki koloba ntina oyo nakomaki yango ete nalingaki kobanda na yango nsima na nzánga oyo, tokozala awa na ngonga ya mitano na ntongo. [Moto moko alobi: “Ekozala malamau.”—Mok.] Kasi nalingi kotanga bobele Liloba moko

lonwa na . . . [“Ekozala malamú.”] Matondi. Longwa na Baefese, mokapo ya 6, molongo ya 12, bobele mpo na mwa ntango moke sikoyo, mpo na mpiko.

Zambi tozali kobunda na mosuni mpe makila te, kasi na bisika na lokumu mpe mikonzi, mpe . . . mikonzi ya . . . molili ya mokili oyo, mpe milimo mabe kati na bisika na likoló.

⁹ “Milimo mabe na bisika na likoló.” Mpe nakosepela kozua longwa na yango motó na likambo mpo na miniti zomi to zomi na mitano, to nkomá, náloba, nalingi kobenga yango: *Etumba*. Etumba ezali momékano ya makasi. Mpe biso, esika oyo tozali na . . . momékano ya makasi. Tozaláká na momesano . . . Ba-Indien bameseneké kotia móto, mpe bakotia motango moko boye ya mibali na nsuka *oyo* ya singa, mpe motango mosusu boye na nsuka *oyo*, mpe ko—kobendana—na—singa, momékano ya makasi, ekobenda baoyo balongami kati na móto. Mpe sikoyo, toyebi ete makambo ezali mingi, mpe tokoki kofandisa yango mwa miniti, na—na ntina na etumba, kasi nalingi koloba na baminiti oyo nokinoki likoló na etumba monene oyo ezalaka, yango ezali, kati na Lingomba ná Satana. Makasi monene wana ya Satana. Mpe tolingi kolobela makasi monene ya Nzambe kati na Lingomba na Ye.

¹⁰ Sikoyo, etumba monene oyo ezali kobundama banda mibu ebele. Ebandaki na Likoló, mpe Satana abwakamaki na mabelé, na nsima akómaki monguna na bato na Nzambe. Mpe, uta ntango wana, asálelaka makasi na ye nyonso mpe mayele mabe na ye mpo na komeka kobenda bato na Nzambe kati ya móto, to, na kati ya móto na ye.

¹¹ Mpe toyebi Nani azali na nguya ya koleka, ezali Nzambe. Mpe Nzambe, ntango Apesaki bato na Ye Eloko ya malamú koleka oyo Akokaki kopesa mpo na kobundisa Satana, ezalaki Liloba na Ye. Sikawa, lokola Liloba ezali Nzambe, mpe nani azali na makasi koleka Nzambe? Boye, Liloba ezali Nzambe, mpe Liloba ekómi makasi na biso. Nzambe kati na Lingomba, akómi Makasi na yango mpo na kobenda Satana kati na móto na ye moko oyo ye asalaki. Mpe kobendana ezali kokóba. Sasaipi, Yesu alobaki, kati na Malako 16: “Na Nkombo na Ngai bakobengana milimo mabe.”

¹² Sikoyo, nayebi ete ezali na elobeli moko ya kala, ete bato, to, ezali na elobeli moko ya kala ete . . . mpe ezali mpenza ya kala te, kutu. Bato bandimaka milimo mabe te na mokolo oyo. Kasi likambo ya kosala, mpo na ngai, ezali nde koyeba monguna na yo. Mpe—mpe koyeba monguna na yo, mpe kosala ngalasisi mpo na etumba oyo okozala na yango ntango okokutana na ye, mpamba te okokutana na ye. Mpe yeba ye, yeba ya ye . . . yeba makasi na ye ezali nini, na bongo sala ngalasisi mpo na etumba

oyo ntango okútáni na ye. Mpamba te eloko moko ezali solo, okokutana na ye, na bongo sálá ngalasisi mpo na etumba yango.

¹³ Sikoyo, kosala ngalasisi mpo na etumba ezali kaka lokola mobeti bibotú. Mo—monguna na ye oyo ye akokutana na ye kuna na etumba, mpo na kobunda, mobundi malamumu ya solosolo na momesano ayebaka mpe ayekolaka motemeli na ye. Ayekolaka bibotú na ye, ayebaka lolenge oyo abundelaka, soki agumbamaka liboso, alálaka nsima, abundaka na loboko ya mobali to na loboko ya mwasi. Ayekolaka nyonso oyo. Mpe na nsima soki azali mobundi moko ya mayele, ya malamumu, amizuelaka moninga mobundi moko oyo akobunda kaka lokola monguna na ye abundaka, mpamba te akoyeba bibotú na ye nyonso ntango akokóma na esika wana.

¹⁴ Mpe nakanisi wana ezali eloko moko ya malamumu mingi mpo Baklisto básala. Ya solo. Mpe sikoyo, soki olingi kobanda kosala ngalasisi, bandá na Yoane 3:16, Mobeko ya Wólo. Bandá mpenza na yango, mpe yango ekomema yo na etando yango. Na bongo sálá ngalasisi mpo na—mpo na kobeta bibotú ya kosukisa etumba, mpamba te ekosengela na yo kósalela yango. Moto nyonso ayebi yango. Osengeli kosala ngalasisi mpo na kobéta monguna na yo. Mpe ntango nyonso, Nzambe asalelaka Liloba na Ye. Tosengeli kokanisa ete Nzambe asalelaka Liloba na Ye mpo na kolóngá moyini na Ye. Soki Nzambe akokaki kokanisa to akokaki kopesa bato na Ye eloko moko ya malamumu koleka mpo na kolóngá monguna ná yango, Alingaki kosala yango. Boye, ndenge nalobaka ntango nyonso: “Ntango Nzambe azui mokano, yango nde ya malamumu koleka. Abongolaka mikano na Ye ata moke te.” Boye mokano ya liboso Nzambe apesaki bato na Ye na elanga na Edene, mpo na kobundisa monguna, ezalaki Liloba na Ye. Bango bakembisamaki ná Liloba na Ye.

¹⁵ Mpe sikoyo monguna akoyekola li. . . mayele ya etumba na biso ná Liloba. Mpe, sikoyo, Satana ayekolaki nyonso wana malamumu be, kino ntango akómaki epai na Ewa, azalaki na ma—mayele ya malamumu koleka oyo akokaki kosalela ye, mpe yango ezalaki ya kobanza-banza ná Liloba. Sikawa, esengeli na yo ata moke te kobanza-banza ná Liloba na Nzambe. Ndima Yango kaka. Komeka kolimbola Yango te. Komeka koluka kososola Yango te. Sikoyo, bokoki kososola Nzambe te, boye Nzambe azali Liloba, mpe Yango esalemi kaka mpo na kondima. Mpe wana ezali Makasi na biso, yamba kaka Liloba. Mpe moto nyonso ayebi ete momboto na mabéle ya lolenge malamumu ekobota mbuma na lolenge na yango. Mpe tozuaka bobele Liloba.

¹⁶ Mpe, sikoyo, Ewa abandaki kotelema mpo na kobanza-banza, ntango a. . . atangelaki ye Liloba, ete: “Nzambe alobaki: ‘Bosengeli kolia mbuma na yango te, mpo mokolo bokolia yango’, mokolo yango tokokufa.”

17 Mpe Satana atikalá kowelana ná ye te. Alobaki: “Na ntembe te, wana ezali solo.” Kasi alobaki: “Omoni, osengeli na Pole ya sika.” Eloko moko ya kokesana moke na oyo Nzambe alobaki. “Mpe soki bosali mpenza yango, bokozala na mwa mayele koleka. Miso na bino ekofungwama.”

Kasi ye alobaki: “Ee, Nzambe alobaki ete tokokufa.”

18 Alobaki: “Oh, na ntembe te. . .” Bomoni, yango wana, kaka moke wana: “Bokokufa solo te.” Kasi Nzambe alobaki bokokufa, mpe yango ekati likambo! Mpe yango—yango ebukaki singana-kobendana monene wana na ngonga wana, mpe ebendaki libota mobimba ya bato kati na kufa, mpamba te Ewa ayokaki mabángo ya kotemela Liloba na Nzambe. Sikoyo, ezali nsoni ete asalaki yango, kasi esilá koleka. Kasi sikoyo biso tozokóba kokémbisama, mpe ekanganeli wana ezóngisamaki kati na Klisto Yesu. Toyebi yango. Nzambe apesaki biso ebatela na biso ya malamumu koleka, kotielala kaka Liloba na Ye motema.

19 Boyebi, mpe bato mingi balobaka lelo ete eloko lokola zabolo ezalaka te. Bandimaka ete ezalalaka na yango bobele likanisi moko. Bandimaka yango. Mpe ezali na bato oyo bandimaka ete—ete—ete Molimo Mosanto azali likanisi ya malamumu, mpe ete zabolo azali nde likanisi ya mabe. Kasi soki botali malamumu, ntango Biblia elobi na ntina na Molimo Mosanto, Alobaki: “Ntango Ye Molimo Mosanto akoya.” Mpe “Ye” ezali likitana bomei. Bomoni? Boye, Ye, Ye azali Moto. Mpe zabolo azali moto. Milimo mabe bazali bato. Iyo, bazali milimo mabe, mpe ba—bazalaka na ndenge ebele. Kasi bango bakanisaka ete ezali likanisi moko ya lolenge ya kala.

20 Mobali moko azalaki kowelana ná ngai awa eleki mwa ba—mpóso. Alobaki: “Oyebi eloko nini osalaka? Obongisaka bobele lobángo na bato wana na kokanisáká eloko moko ntango oyebisaka bango eloko wana. Ezalaka kaka mbongwana ya makanisi.”

21 Nakutanaki na eloko yango moko mpenza na Inde mbala moko, ntango bato ya bulee wana kuna epai oyo tozalaki na eyanganelo, nabanzi, ya monene koleka oyo naticalá kosolola na bango, na eyanganelo moko, ya kozala na bato ndambo na milió, mpe nasimbaki likambo yango na nzela ya lisosoli na Molimo. Mpe bakokaki komona Molimo Mosanto kobenga bato, mpe kobenga bango, na kati na eyanganelo, mpe koloba makambo ndenge na ndenge, mpe kosimba makanisi na bango. Ba-Rajas mpe bato na bulee yango, balobaki: “Azali kotanga makanisi na bango.”

22 Boye nsima na mwa ntango, mitano to motoba balekaki na molongo ya mabondeli, mpe mobali moko mokufi miso ayaki. Mpe akufaki miso nyonso mpenza, mpe miso na ye ezalaki mpembe lokola simisi na ngai. Mpe nalobaki: “Sikoyo mokufi miso moko ye oyo, moto nyonso akoki komona ete akufá miso.”

Mpe nalobaki: “Soki nakokaki kosunga ye nalingaki kosala yango, kasi nzela bobele moko oyo nakokaki kosala elingaki kozala na nzela ya likabo, koloba ntango mosusu eloko moko oyo ye asalaki; mpe yango ekoki kopesa likanisi ete soki Nzambe ayebi likambo oyo asilaki kosala, na ntembe te Akoyeba likambo nini ye akolinga kosala.” Bongo nalobaki: “Sikoyo, kotaláká ye,” nalobaki: “sikoyo, azali mosambeli ya mói. Akufi miso eleki mibu ntuku mibale.” Mpe, ntango molimboli alobaki yango, ezalaki ya solo. Nalobaki: “Azali mobali abalá. Ye. . .mwasi na ye azali nzoto moke, mpe azali na bana mibali mibale, moko pene na mbula nsambo, moko libwa.” Ezalaki mpenza ya solo. Bankombo na bango ebengamaki, oyo yango ezalaki.

²³ Bongo uta na eyanganelo yango, na esika oyo bato bazalaki, bolengi wana eyaki, “Ezali nde makanisi, ezali eloko moko lokola ma—mabanzo ya botangi makanisi.”

²⁴ Bongo nakanisaki: “Nkolo, soki Okoki kosunga ngai. Na—nasengeli na lisungi na Yo, Nkolo. Bato oyo bazali komeka kokómisa likambo oyo botangi makanisi. Mpe ezali bongo te, mpe Oyebi yango, Nkolo.” Ata bongo, napesaki bango Likomi oyo Yesu alobaki ete Azalaki kosala eloko moko te kino Tata álakisa Ye yango. Na bongo, nabalukaki mpo na kotala mobali yango lisusu, namonaki ye likoló kati na emononeli, ná miso malamú kaka ndenge nazali na yango. Nakanisaki: “Sikoyo nde ngonga yango.”

²⁵ Nalobaki: “Mobali oyo azali mosambeli ya mói, sikoyo, mpe akomá miso ya kokúfa.” Mpe nalobaki: “Sikoyo, ba. . . Ezali na banganganzambe ya ba—muzilman, mpe ezali na—na banganganzambe ya ba—Sikhs, ba—Jains, mpe mangomba ndenge na ndenge, Buddha. Sikoyo, moto oyo alingi kozongela komona na miso na ye. Sikoyo, bokoloba ete a—asámbelaki bokelami na esika ya Mokeli. Nandimaka mpe yango. Kasi tala biso oyo tofandi na mpokwa oyo.” Nalobaki: “Mpe tozalaki. . .lelo nasololaki na tempelo ya ba—Jains esika biyamba ndenge na ndenge zomi na nsambo ezalaki wana mpo na kotuna ngai mituna, mpe moko na moko na bango kotemeláká Klisto, moko na moko na bango!” Mpe nalobaki: “Sikoyo, mpe mingi kati na bino bato bozalaki kuna. Sikoyo soki Klisto azali mpenza na libunga, boye moto oyo alingi kozala na solo, mpe na bosolo Nzambe ya bokelami Oyo asalaki mokili akozala bobele Moko Oyo akoki kopesa ye komona na ye. Ezali alimá bongo.” Mpe nalobaki: “Sikoyo, soki moto moko kati na bino, Bo—mizilman nde ezali eyamba oyo ezali kokamba, soki nganganzambe ya Mizilman akolinga koya awa mpe kopesa moto oyo komona na ye, boye nakolanda Bo—mizilman, to soki nganganzambe ya Buddha akolinga koya kopesa ye komona na ye. Kasi tika ete Nzambe Oyo asalaki ye, Nzambe, esengeli kozala na moto moko oyo azali Nzambe esika moko, mpamba te, tokoki kozala na bokelami te kozanga Mokeli. Mpe esengeli na Mokeli

mpo na kokela komona kati na miso oyo. Azali mokúfi miso mibu ntuku mibale na kotaláká mói, kokanisáká ete akokende na Lola soki asalaki yango. Moto oyo na bozangáká koyeba, asalaki yango.” Nalobaki: “Bino ba-nganganzambe ya Buddha bolingaki kosala nini? Bokobongola bobele lolenge na ye ya kokanisa. Bokoloba ete azali na libunga.” Basámbelaka bankóko na bango oyo bakúfa. Mpe nalobaki: “Sikoyo, bokokanisa ete azalaki, bokoloba ete azalaki na libunga, kasi bokosala nini? Bokobongola lolenge na ye ya kokanisa.” Mpe nalobaki: “Ba-Mizilman balingaki kosala nini? Kobongola lolenge na ye ya kokanisa. Ba-Sikhs, ba-Jains, mpe bongo na bongo, kobongola lolenge na bango ya kokanisa.”

²⁶ Nalobaki: “Tozali na eloko yango moko na Etats-Unis. Ba-Methodiste nyonso balingi kokómisa ba-Batiste nyonso bákóma ba Methodiste, mpe Pantekotiste alingaka kozua ba-Methodiste nyonso mpe kokómisa bango ba-Pantekotiste. Ezali mbongwaná ya makanisi. Kasi yango te nde likambo oyo tozolobela. tozoloba na ntina na Nzambe, Mokeli.” Mpe nalobaki: “Ya solo mpenza, Mokeli akoloba.” Mpe, sikoyo, nakokaki koloba yango te soki emononeli wana ezalaki wana te, ata moke te. Sikoyo nalobaki: “Sikoyo, soki Ye oyo azali, tika ete Ye ázala Nzambe, áya kopesa ye komóna na ye.” Mpe nalobaki: “Nabeti mondengé na nganganzambe nyonso, Raja, to moto mosantu to nyonso oyo ekoki kozala, áya kopesa ye komóna na ye, mpe ngai nakolanda boyekoli bwanya na bino, bobóngolisi moto moko motema.” Mpe oyo wana ezalaki etónge ya bato ya kimia koleka oyo nasílá koyoka. Bomoni? Moto moko te asalaki yango.

²⁷ Mpe nalobaki: “Mpo na nini bozali kimia boye?” Nalobaki: “Ntina oyo bozali kimia, ezali mpo bokoki kosala yango te, mpe nakoki kosala yango mpe te. Kasi Nzambe ya Lola Oyo asekwisaki Mwana na Ye Yesu Klisto, oyo biso tozali basali na Ye, auti kotalisa ngai emononeli ete moto oyo akozongela komona na ye.” Bomoni? Nalobaki: “Sikoyo, soki ezali bongo te, boye bokoki kobengana ngai na Inde. Kasi soki ezali bongo, moko na moko na bino bosengeli kopesa bomoi na bino epai na Yesu Klisto. Nakosepela kotuna bino, bato boni bazali awa bokolinga kopesa bomoi na bino epai na Klisto soki mokufi miso oyo azui komona na ye? Bomoni banganganzambe na bino, moto moko te amatí awa. Mpo na nini bayei te, soki balobaki na bino ete losambo na bango ezali mpenza monene mpe monene mingi? Mpo na nini moto moko te ayei mpo na koloba eloko moko?” Moto moko te ayaki. Nalobaki: “Na bongo bino bato oyo bozali kuna, soki bomoni mokufi miso oyo ateleme awa . . .”

²⁸ Mpe monganga moko ayaki mpo na kotála miso na ye. Aningisaki motó, alobaki: “Azali mokufi miso.”

²⁹ Na bongo nalobaki: “Na ntembe te, azali mokufi miso.” Kasi nalobaki: “Soki. . . Mpe soki Nzambe apesi ye komona na ye, bato boni kati na bino bokosalela Yesu Klisto?” Mpe na mosika

mpenza ndenge nakokaki komona, ebale monene ya maboko ya moindo. Nabalukákí epai na moto yango, mpe nalobákí: “Nkolo Yesu, tika ete éyebana ete Ozali Nzambe.” Moto yango akangaki ngai na kingo, mpe moyangeli engumba ya Bombay afandaki wana, ayampaki ye na kingó, akomaki komóna polele lokola moto nyonso.

³⁰ Ezali nini? Ezali—ezali mpenza nguya nde! Nzambe azali Nzambe, mpe Satana azali Satana! Soko ondimaka na zabolo te. . . Ntango nabandaki liboso, na—nazalaki kobetana motó ná ye mikolo nyonso. Bóyebisa ngai te ete molimo mabe ezalaka te, mpo nayebi yango malamú koleka. Nasengeli kobunda na ye mokolo na mokolo. Boye nayebi ete zabolo moko azalaka—azalaka. Mpe osengeli koyekolisama malamú ntango okokutana ná ye. Koyekolisama na psychologie te, koyekolisama na kelasi te; kasi koyekolisama na Molimo Mosanto; Nguya na Nzambe kati na Liloba na Ye mpo na kotalisa Yango polele. Yeba monguna na yo. Oh, eloko ya kanza oyo ye azalaka!

³¹ Ndenge nakolinga mpenza kotelema awa sikoyo mpe kotalisa likambo yango, kozóngá kati na Biblia mpe kotálisa bino moto moko kuna, oyo akutanaki na ye miso na miso. Ndenge kati na etumba esóngó na monguna, bamikembisaki na Liloba na Nzambe. Noa abikaki likambo yango, mpe ayebaki ete Nzambe ayebisaki ye ete mbula ekonoka. Mpe etumba ezalaki katikati na zébi ná Liloba na Nzambe: Zebi elobaka: “Ekoki kosálema te.” Nzambe alobaki: “Ekosálema.” Amen.

³² Eloko yango moko ezalaka lelo. Ekosálema! Esálemaka mpenza! Milimo mabe bazalaka! Kasi Yesu abenganaka bango, mpe Apesaki Lingomba na Ye bokonzi ya kosála bongo: “Bóbengana milimo mabe na Nkombo na Ngai!” Abenganákí milimo mabe nsambo na mwasi moko ya kitoko mokolo moko. Mpe Alobaki: “Ntango molimo na mbindo abimi na moto, atámbolaka na bisika bikauká, na nsima akozonga, komemáká milimo mabe mosusu nsambo elongo ná ye.” Sikoyo, wana etalisaka ete soki moto yango asilaki kopetolama na milimo mabe, eloko moko ezalaki kati na ye oyo ebimaki. Molimo mabe abimaki! Sikawa, ntango zabolo abimi, wana Nzambe. . . epesaka Nzambe libaku ya kokóta. Bongo, mpe ntango akei, tika ete Molimo Mosanto ákota. Kotika yango kaka wana te. Soki obongoli kaka motema na masumu na yo mpe okei na yo, na bongo okozala mabe koleka liboso. Kasi sala ete esika oyo Satana abikáká mpe azuáká esika, tóndisá yango na Molimo Mosanto ya Nzambe, na nsima, okozala na makasi ya Liloba na Nzambe kati na yo, emonisami, mpe okobengana milimo mabe. Etumba ezali konginda. Pole ya mpokwa ezali kongenga. Molimo Mosanto na Nzambe azali awa.

³³ Mpe sikoyo ezali kaka pene na—pene na miniti misato kino ntango ba—piólóló ekobanda kobetama, mpe ekozala midi ya butu. Na bongo, wana tokotika ndako oyo, mpo na kokende

na bisika ndenge na ndenge na biso mpe na bandako na biso, mpo na kokutana na baoyo ya libanda, mpo na kokutana na mokili, tika ete tókende te lokola tosálaka na ba-ntango ya kala. Tókende kati na nguya ya lisekwa na Ye. Tókende na Nkombo na Yesu Klisto, ná bendele enetolami likoló, mpe ná kondima kati na Liloba na Ye, mpo na kosimba Mopanga mopeli bipai mibale, ná nguba ná molato ya ebundeli nyonso ya Nzambe, mpo na kokutana na monguna, mpamba te azali kokóba kokóma makasi koleka mpe na nguya mingi koleka mokolo na mokolo. Wana—wana monguna ayaka lokola mpela, Molimo na Nzambe ekotelemisa bendele mpo na kotemela ye. Soki tokómi na nsuka ya makambo oyo to...mpe ete mabombami na Nzambe esukisami ná biso, toluka kozala na makasi ya koleka, makasi ya konetolama, mpo na kokutana na...makasi ya mabe koleka, yango nde ekonétola Lingomba mpe ekomema yango na Nkembo. Tosengeli kozala na yango. Tókutana na mobu '63 ná kobeta mondengé moko, lokola tozali basali ya Nzambe na bomoi! Mpe lokola Sadalaka, Mesaka, mpe Abede-nego ya kala, tokogúmbamela milimo mabe ya mokili oyo te mpe kowangana te eloko oyo tosololaki na ntina na yango, kasi tika ete tókende liboso na etumba.

³⁴ Nazali koyoka na mpokwa oyo, lokola tozali koyoka bapiólóló yango, eloko moko lokola Dawidi asalaki na butu ya molungé makasi wana ntango aláláki na nsé na nzeté na báka, mpe monguna azalaki koya. Ngonga nini oyo esengelaki kozala mpo na Dawidi! Ntango nini oyo ezalaki mpo na ye wana alalaki kuna! Ayebaki te ndenge nini kokende liboso, ayebaki te nini kosala, mpamba te ayebaki ete azalaki na bato mingi te. Kasi, na mbala moko, ayokaki lokito ya Mopepe kopepa likoló na nsóngé ya banzete. Ayebaki ete Nzambe azalaki kokende liboso na ye, mpe akendeki na etumba. Nazali koyoka eloko moko ya ndenge wana na mpokwa oyo, nsima ya Liteya ya lobi na mpokwa, nazali kolala na ngonga ya molili makasi koleka oyo natikálá kokutana na yango na bomoi na ngai. Nazali komiyoka lokola Yisaya, na tempelo nsima na komona banje wana, nazali moto na bibebu na mbindo, mpe nafandi elongo ná bato na bibebu na mbindo. Kasi bóyoka, na—nazali...Nasengeli kokutana na yango na lolenge moko to mosusu, mpe, na eloko bobele moko, nazozela koyoka makelele na kati ya banzete ya baka, mpo na kokende kokutana ná monguna ezala ata wapi. Nzambe sunga biso tósala yango.

³⁵ Mpe sikoyo nakanisi ete etikali miniti moko kino ngonga ya zomi na mibale. Mpe mobu 1962 ná makambo na yango nyonso eleki, tika ete tótika yango na eleko eleki.

³⁶ Tótelema sikoyo, moko na moko na biso mpenza. Etumba ezali konginda. Moko na moko na bino...Paulo alobaki: “Kobósanaká makambo oyo masili koleka,” mabungá na biso nyonso ya mobu eleki, “nazali kokoba kokende liboso kino na ebiangeli eleki likoló.” Mabungá na ngai nyonso oyo nasalaki

kati mbula nyonso oyo, limbisa ngai mpo na yango. Nzambe, limbisa ngai. Lingomba, limbisa ngai. Mpe lotómo oyo na—nazomiyoka ete nakweáki na yango; Nzambe, limbisa ngai mpo na yango. Lingomba, bólímisa ngai mpo na mabunga na ngai. Mpe nakokóba kokende liboso kino na elembo ya ebiangeli ya likoló kati na Klisto Yesu. Oyo nyonso lobi esimbi, nayebi te, kasi nayebi Nani asimbi mobu 1963.

³⁷ Tótombola maboko epai na Nzambe sikoyo mpe tóbondela na ndenge na biso moko, wana tozali koyámbola masumu na biso, mpe kosenga na Nzambe ásungá biso na mobu mozali koya oyo.

³⁸ Tata na Likoló, wana totelemi awa, wana makanisi ebele ezali kokufa na mitema na biso, mpe na oyo etali mabunga ya mbula eleki, mpe wana tozali kobelema na kufa ya mobu '62 mpe mbotámá ya mobu '63, E Nzambe, tika ete tómata litambé moko likoló koleka na ebuteli, kino tókoka komona Yesu ná manáka na Ye. Tika ete moto nyonso awa, Nkolo, kati na libondeli, wana mbula ya kala ezali kokufa, mpe mbótama ya sika ya mbula ya sika ezali kokóta, tika ete lisumu ya moto ya kala mpe kozanga kondima ékufa na motema na biso, mpe Mbotama ya sika éya elongo ná mobu 1963, lokola makelele ya Mopepe makasi oyo ekoki kotondisa bikelamu na biso mpe kokómisa biso bikelamu ya sika kati na Klisto.

³⁹ Komisa biso basali oyo babongi. Limbisa makambo na biso maleka. Pambola mikolo na biso mikoya. Kamba biso, E Nkolo Nzambe, na loboko na Yo ya nguya, Yawe. Pámbola batei oyo bazali awa. Pambola bato nyonso, bapaya nyonso. Zalá ná biso elongo, Nkolo. Tozali basali na Yo mpe tomipesi mobimba epai na Yo mpo na mobu 1963, éte nguya ya Molimo na Yo ézala na bokonzi koleka na bomoi na biso mpe na bozali na biso. Sunga biso, Nzambe. Limbisa biso mpe sunga biso, tobondeli. Telemisa mibali na nguya! Telemisa babundi makasi ya Kondima! Fungólá mbula oyo, Nkolo, Mána wana ebómbamaki, Libanga wana na nsé ya libanga, mpo tókoka komona mwango na Nzambe. Fandisa libanga ya motó likoló na piramídi ya bomoi na biso, Nkolo; tia Libanga ya motó, Klisto Yesu, likoló na moko na moko na biso. Tika ete mapamboli na Ye ya bulee oyo eleki monéne ézala likoló na biso nyonso. Tika ete móto ya Molimo Mosanto éya likoló na biso. Tika ete nguya ya lisekwa émónisama polele. Nzambe, totondi Yo mpenza, na mpokwa oyo. Tozali wa Yo. Tomipesi mobimba epai na Yo, Nkolo.

⁴⁰ Wana nazali kokende kuna, kozanga koyéba esika nini to ndenge nini, to eloko nini nakosala, Natieli Yo motema, Nzambe na Nguya nyonso, ete Okokamba ngai, mosali na Yo ya mpamba, mpo ngai nákoka kozala esalelo mpo na lokumu mpe nkembo ya Oyo-na-Nguya-nyonso. Kokisa yango, Tata.

41 Yamba mabondeli na biso. Pambola makasi na biso. Bikisa babeli ná baoyo batungisami, na molimo mpe na nzoto. Mpe kómisa biso basali na Yo. Tozali mabele, Ozali Moyemi mbeki. Bongisá biso, moko na moko, na lolenge na Yo Moko, ete tókoka kokokana ná Klisto Yesu, lokola enámá ya Nzoto na Ye. Mpo tosengi yango na Nkombo na Yesu, mpe na ntina na Ye mpe na ntina na Nsango-malamu. Amen mpe amen.

[Ndeko mobali moko alobi minoko na sika. Ndeko mosusu apesi ndimbola—Mok.]

42 Matondi na Yo, Tata Nzambe. Totondi Yo mpo na elendiseli oyo ya Mbula ya Sika oyo ezali kotinda biso ná bilikia mpe kobondisama ya koyebáká ete na nzela ya maloba oyo elobami na bato oyo bayebaki te, ete Nsango ezali solo, mpe Ozali kosenga na biso ete tókangama ná Yango. Tokosala nyonso oyo toyebi, Nkolo, mpo na kotelema ná Yo mpe Liloba na Yo.

43 Yamba biso na Nkombo na Ye Oyo alakisaki biso nyonso ete tosengeli kobondela boye: [Ndeko Branham na lingomba babondeli elongo—Mok.]: “Tata na biso Oyo azali na Likoló, Nkombo na Yo ébulisama. Bokonzi na Yo éya. Mokano na Yo ésalema na nsé, lokola esalemaka na Likoló. Pesa biso lelo bilei na biso ya mokolo na mokolo. Mpe limbisa mabe na biso, pelamoko biso tolimbisaka baoyo basalelaka biso mabe. Mpe kamba biso kati na komekama te, kasi bikisa biso na mabe; mpo Bokonzi, mpe nguya, mpe nkembo ezali ya Yo, libela na libela. Amen.”

44 Nkolo ápambola bino mpe ábatela bino. Kasi sikoyo baoyo basengeli kokende na bandako na bango. . . Sikoyo ekomi miniti mitano nsima, ekomi miniti mitano na mobu ’63. Sikoyo, tika ete Nzambe ápambola bino. Mpe—mpe bino baoyo bolingi kotikala mpo na elámbo, botombelami boyei bolamu mpo na kotikala, tokozala na esengo ya kozala na bino. Ezali elámbo te oyo eponi bilongi, ezali mpo na mondimi nyonso oyo azali kati na boyokani ná Klisto. Botómbelami boyei bolamu kotikala mpe kolia elámbo elongo ná biso. Mpe ntina oyo tosalaka oyo ezali mpo oyo ezali eloko ya liboso, tozobanda mobembo. Mpe Yisraele, liboso bábanda mobembo na bango, babomaki mwana-mpate mpe baliaki matiti mobesu, mpe babandáki mobembo na bango. Mpe nakanisaki: “Likambo oyo ebongi mpenza na mpokwa oyo!” Mwana-mpate asili kobomama, Esili kolengelama, límpati, mpe ezali midi ya butu. Na ntango wana nde baliaki yango, boyebi, na midi ya butu. Boye, tika to, bino baoyo bolingi kotikala elongo ná biso mpe komilengela mpo na mobembo oyo ekoya, oyo ezali liboso, tokozala na esengo ya kozala na bino. Nzambe ápambola bino.

45 Mpe bino baoyo bosengeli kokende sikoyo, bokoki kokende na bandako na bino, mpe Nzambe ázala elongo ná bino kino nakokutana na bino lisusu. Amen. Bino baoyo botikali bokoki

kofanda mpe na nsima tokobanda elámbo. Ndeko mwasi ako . . .
Malamu, mesié.

Kino tokokutana! kino tokokutana!

Kino tokokutana na makolo na Yesu; (kino
tokokutana!)

Kino tokokutana! kino tokokutana!

Nzambe ázala na bino kino tokokutana lisusu!

⁴⁶ Tóyémba yango lisusu wana tozali kozela, boyebi, mpo na
baoyo bazali kobima. Ekosengela na biso kokóma kimia, mpe oyo
ezali mpenza likambo ya limemia. Nakotanga eloko moko uta
na Likomi awa mpo na mwa ntango, oyo ezali mpenza, mpenza,
malamu mingi. Mpe sikoyo tóyemba yango lisusu.

Kino tokokutana! Kino . . .

Tópésa mbote ya loboko na moto moko. Soki eloko moko
ya mabe ezali na bomoi na yo, ete moto yango azali awa oyo
osalelaki ye mabe, kende epai na ye sikoyo mpe bongisa yango.

Kino tokokutana! kino tokokutana!

Nzambe . . .

Mobeti piano akolinga koya na piano?

. . .elongo ná bino kino tokokutana lisusu!

Kino toko . . .

⁴⁷ [Ndeko Neville alobi: “Nzambe ápambola yo, Ndeko
Branham.”—Mok.] Natiki nyonso oyo na maboko na yo, Ndeko
Neville. [“Nkolo ápambola yo. Nandimi . . .? . . .”] . . .? . . .

Kino tokokutana!

Nzambe ázala na bino kino tokokutana lisusu!

Nzambe ápambola yo, ndeko mobali.

Alandelaka likambo na yo,

Alandelaka likambo na yo;

Na mói to na molili,

Alandelaka likambo na yo.

Tóyémba yango lisusu.

Alandelaka likambo na yo,

Alandelaka likambo na yo;

Na mói to na molili,

Alandelaka likambo na yo.

⁴⁸ Ezali kitoko? Tóyemba yango lisusu wana bazali kofanda
kimia.

A . . .

Bókanga bobele miso.

. . .mpo na yo,

Alandelaka likambo na yo.

Na mói to na molili,

Alandelaka likambo na yo.

⁴⁹ Tata na Likoló, tozali na nsái mingi ya komona ete yango ezali solo, ete na bangonga na biso ya molili koleka to na bongengi ya mói, Atikaka to asundolaka ata moke te. Tozali na esengo mingi mpo na yango ete tozali na, kondimisama na biso etongami likoló na eloko mosusu te bobele Makila na Yesu ná boyengebene. Totii motema, Nkolo, na lokumu ya mokili oyo te. Totiaka motema, tomekaka ata moke te kotia motema na bomengo ya koleka, kasi tomípesaka mobimba na Nkombo na Yesu. Totóndi Yo mpenza, Tata.

⁵⁰ Sikoyo tobelemi mpo na kokóta na moko na—moko na mwa mibeko oyo Otikelaki biso ete tokokisa na nzoto oyo. Moko na yango ezalaki libatisi, mosusu ezalaki elámbo, mpe oyo elandi ezalaki kosukola makaká. E Nzambe, tozali mpenza kokóta na limemia nyonso, koyebáká ete Mwana—mpate oyo azali Mwana—mpate ya elekeli. Mo—mobembo monene na lisobe ezalaki kaka liboso ya bana. Makila esengelaki kotiyama liboso likoló na likonzi ya ekuke, liboso mwana mpate ya elekeli ákamatama.

⁵¹ Nzambe, tala mitema na biso sikoyo. Makila ezali nde wana, Nkolo? Soki ezali te, tobondeli ete—ete Ótia yango sikoyo mpenza, mpo na kolongola masumu na biso mpe kozipa yango, mpe ekolongolama na biso, Nkolo, masumu ya mokili oyo, ete tókoka kozala bulee mpe tólongobana liboso na Tata na biso sikoyo wana toyei mpo na kozua nzo—nzoto ná Makila masopani ya Mwana mpate, Mwana na Nzambe, Mobikisi na biso. Tála—tála mitema na biso, wana tozali kotánga, Tata, na nsima kómisa biso baoyo ya Yo Moko. Mpamba te tosengi yango na Nkombo ya Mwana—mpate, Yesu Klisto. Amen.

⁵² Kati na Buku ya—ya Bakolinti, mokapo ya 11, nalingi kotánga mwa milongo, kobanda na molongo ya 23, natangi oyo. Ezali nde Paulo koloba na lingomba ya Kolinti.

Mpo ete yango ezuaki ngai epai na Nkolo mpe epesaki ngai bino, Ete Nkolo Yesu na butu yango moko . . . oyo ekabamáki ye akamataki lipa:

Mpe ntango esilaki ye kopesa matondi, abukaki yango, mpe alobaki: Bokamata, mpe bolia: oyo ezali nzoto na ngai, oyo ebukani mpo na bino: bosalaka boye mpo na ekaniseli na ngai.

Bobele bongo nsima na kolia, akamataki kopo, azuaki kopo, mpe esilaki ye kolia, azuaki kopo, kasi esilaki ye kolia . . .

Bólimbisa ngai. Bótika nátánga yango lisusu.

Bobele bongo mpe akamataki kopo, mpe wana esilaki ye kolia, alobaki, Kopo oyo ezali kondimana na sika na makila na ngai: bosalaka boye na ekaniseli, mbala na mbala ekomela bino oyo, na ekaniseli na ngai.

Mpamba te mbala na mbala ekoliaka bino kwanga, mpe ekomelaka bino kopo oyo, bozali kosakola kufa na Nkolo kino ekoya ye.

Yango wana moto soko nani akolia lipa, mpe akomela kopo na Nkolo, na motindo mobongi te, azali na ekweli na ntina na nzoto mpe na makila na Nkolo.

Boye tika ete moto ámimeka ye moko mpenza, bongo ália lipa yango mpe ámela kopo yango.

Zambi ye oyo akoliaka mpe akomelaka na motindo mobongi te, akomiliela mpe akomimelela ekweli, soko akososola nzoto na Nkolo te.

Mpo na ntina oyo mingi bazali na bolembu mpe na malali kati na bino, . . . mingi balali.

Mpo soko nde tokomisosola, tokozua ekweli te.

Kasi wana tomisambisi, tozui etumbu na Nkolo, ete tokweisama elongo ná mokili te.

Bongo, bandeko na ngai, ntango bokoyanganaka mpo na kolía, bozelanaka bamoko na bamosusu.

Mpe soko moto moko ayoki nzala, tika ete ália na ndako; ete boyangana mpo na kozua ekweli te. Mpe nakobongisa makambo matikali wana ekoya ngai.

⁵³ Wana ekanisi ngai na ntina na oyo, ntango ya limemia koleka! Ekomami lisusu ete ntango elámbo oyo epesamaki liboso, mpe kosukola makáká. . . oyo tosengeli kotika na mpokwa oyo, mpo tozali na mai te. Mai nyonso esili kokatama, mpe tozalaki ata na bisika ya zongo te na mpokwa oyo, mpo basengelaki kobongisa yango ná makoki na bango nyonso, mpo biso tózala na liyangani oyo na mpokwa oyo. Kasi tokosala ndenge bango basalaki, balobaki, nandimi Luka nde alobaki yango, ete “Bayembaki nzembo mpe babimaki.” Kasi boyebi nini likambo oyo ezali kotalisa? Boyebi, na ebandeli, ntango motindo oyo epesamaki liboso na Yisraele, kuna na Ejipito, bazalaki na nzela ya kokende na mboka na elaka. Mpe ezali bongo nde tozalí komiyoka na mpokwa oyo, ete tozali na nzela kokende na Mboka na Elaka. Mpe mobembo ezali liboso na biso.

⁵⁴ Mpe bazalaki na elembo, ete ntango mwanje na kufa alekaki, ete makila esengelaki kozala na ekuke, soki te mwana mokoló to mwana ya liboso akufaki na kati na ndako. Likanisi ezalaki, mpe ndimbola ya solo ezalaki, esengeli liboso kotia makila. Bomoni ndenge nini Paulo atiaki yango awa? “Soko moto nani alei na motindo mobongi te, akomiliela mpe akomimelela ekweli, soko akososola nzoto na Nkolo te,” yango elingi koloba eloko moko, ete kufa, kufa ya molimo, ezali likoló na moto oyo akoya na mesa na Nkolo na motindo mobongi te. Elingaki koloba, komela masanga mpe kokóba bongo, kobika lokola mokili, mpe koya na mesa na Nkolo. Tosengeli kosala bongo te. Sikoyo,

tópétola mitema na biso mpe tópétola maboko na biso na . . . mpe makanisi na biso na makanisi ya mabe, mpo tókoka koya na mesa na Nkolo, na limemia mpe bulee, wana toyebi ete tomikangisi ná Mbeka na biso, Klisto Yesu, Oyo azali lobiko na biso se moko.

⁵⁵ Mpe sikoyo, na mpokwa oyo, lolenge oyo tosalaka likambo oyo, ezali ete moko na bampaka atelemaka awa, Ndeko Zabel. Mpe nakanisi, Ndeko Zabel, na mpokwa oyo, soki okobenga longwa na eteyelo liboso, mpo bato oyo bákoka kouta na esándá mpe kosala molongo na bino ya liboso awa, soki olingi. Sikoyo, Ndeko Zabel akokamba bino, na mwa ntango moke, kaka ntango tokoloba lipamboli likoló na elámbo yango.

⁵⁶ Lipa ya kosher oyo, esalemi na Baklisto. Ezali lipa ezangi levire. Mpe soki botali yango, ntango otii yango na monoko na yo, ezali mpenza makasi-makasi, mpo na kozala bololo. Ezali manyunyuka, ebúkanibúkani, mpe esangisami, elingi koloba nzoto ebukani, ezoká-zoká ya Nkolo na biso Yesu. Oh, ntango kútu nakanisaka yango, motema na ngai esalaka lokola ételema! Ntango nakanisaka ete Ye akatamaki-katamaki nzoto, atutamaki mpe abetamaki, Mwana na Nzambe oyo ayebi mabe te! Boyebi mpo na nini Asalaki yango? Mpo ngai nakweisamaki. Mpe Ye akómaki ngai, mosumuki, ete ngai na nzela ya Mbeka na Ye, nákoka kokokana ná Ye, mwana na Nzambe. Mbeka nini Oyo!

Tógumba mitó.

⁵⁷ Nzambe na Bulee Koleka, ndenge nasimbi na ememeli moké ya ebendé na mpokwa oyo, lipa oyo ezali kotálisa nzoto na Nkolo na biso, oyo ebukanaki, ekatamaki-katamaki, etutamaki, ebetamaki, wana mosakoli agángaki: “Azokisamaki mpo na masumu na biso, Atutamaki mpo na bokesene na biso, etumbu oyo eyeiseli biso kimia ezalaki likoló na Ye, mpe na mapipi na Ye biso tobikisamaki.” Ohthank, boni tozali kokundola likambo yango, Nkolo! Wana namikangi na Mbeka wana na mpokwa oyo, ná eyanganelo oyo mpe lokola, Nkolo, na Mbeka yango, tika ete tókanisa lisusu Nkolo na biso, kufa na Ye mpe kobetama na Ye, mpe nyonso oyo Alekaki na yango mpo na biso, wana tozali kozua lipa oyo na minoko na biso. Nzambe, tozali bato babongi te, tolongobani na eloko ya bulee ya boye te, na boye tika ete boyengebene na Yo, Nkolo, Bozali na Yo mpe Makila na Yo, épetola mitema na biso. Mpe wana tozali kozua yango, tika ete tókána na makanisi na biso ete tósalela Ye ntango nyonso butu ná mói, mikolo nyonso na bomoi na biso. Sikoyo bulisá lipa oyo mpo na ntina na yango. Tosengi na Nkombo na Yesu. Amen.

⁵⁸ Mpe nasimbi oyo na maboko na ngai, lokola ntuku misato- . . . pene na mbula ntuku misato na misato ya mosala nasaleli Nkolo na ngai, mpe nazali komíyoka nsoni. Kasi nakanisi, nakokaki kosala nini soki nazalaki mpenza na matangá mibale ya Makila na Ye, kosimba yango na loboko na

ngai na mpokwa oyo? Nakokaki kosala nini ná yango? Kasi, boyebi, na mpokwa oyo, nazali na maboko na ngai, liboso na Ye, ya monene koleka, ezali lisómbi ya Makila na Ye, Lingomba na Ye. Boye, ntango nasimbi oyo, mpe mai ya mbuma na miwiti oyo, nakanisi yango. Alobaki: “Nakomela lisusu mbuma ya miwiti te kino nakomela yango lisusu ná bino na kati na Bokonzi ya Tata na Ngai.” Bongo botala ete nsima na etumba ya lisumu kosila, eloko ya liboso tokosala, ntango tokokóma na ngámbo mosusu, ekozala kolia elámbo, elámbo na Nkolo.

⁵⁹ Mpe tógumba mitó na biso wana tozali kopambola vinyo oyo. Tata na biso na Likoló, ntango nakanisi, wana nasimbi vinyo oyo etalisi Makila na Yesu, ndenge ete na nzela na Makila yango kotanga, masumu na ngai elongamaki. Etiami kati na Mbu monene na Kobosana, mpe mpo na kokanisama lisusu te. Mpe ná Makila yango, mwana mobali moko azalaki kokufa mokolo moko, alalaki kuna na lopitalo, mpe Obikisaki ngai. E Nzambe, ndenge natondi Yo, Nkolo. Na bongo opesi ngai mokumba, na nzela na Molimo Mosanto, mpo na kokamba bato na Kalvári mpe kotalisa bango nzela ya kokende Ndako. Natondi Yo, Tata. Mpe sikoyo búlisá vinyo oyo mpo na mosala mosengeli yango kosala. Mpe tika ete moto nyonso oyo akosangana na sakramentu oyo, na mpokwa oyo, ázua makasi ya molimo mpe ya nzoto mpo na mobembo oyo ezali liboso. Mpo tosengi yango na Nkombo na Yesu. Amen.

[Eyanganelo bazali kopesama elámbo. Maloba mazangi na eteni oyo ya bande—Mok.]

⁶⁰ Kotelema awa mpe kotala mabota kokóta, mpe ekozala bongo moko na mikolo oyo, libota na libota, molongo na molongo, etóngá na etóngá, moko na moko. Ntango tokokutana na Ye, ntango nini oyo yango ekozala, ntango bomoi nyonso ya bomoto oyo ezalaki na mokili, baoyo bandimelaki Ye mpe batielaki Ye motema, bakokutana kuna na Mokolo wana. Ekozala kitoko mpenza, boye te? [Lingomba balobi: “Amen.”—Mok.]

⁶¹ Tosengeli kozangisa kosukula makáká na mpokwa oyo mpo na mai. Tozali na bisika ya kokende komisunga mpenza te sikoyo, mpe ekobongisama kala mingi te, tozolikia. Bazali kokóba na yango malamú, mpe kosala mosala nokinoki mpo na tabernacle ya sika. Na lolenge moko boye, nabanzi ete oyo ezali malamú kozala na elámbo na mokolo ya liboso ya mbula boye, na ngonga oyo ya mokolo.

⁶² Sikoyo, bino baoyo bouti libanda na engumba oyo, bókumba mituka na bokebi wana bozali kozonga na ndako. Tika ete Nzambe ázala na bino. Mpe bino baoyo bozali bato na mboka awa, pene, Nzambe ázala na bino mpe ázunga bino. Mpe sikoyo, soki Nkolo alingi, mpe nasengeli kolongwa mpo na liyangani oyo ezali koya kuna na Arizona, na nsima, soki Nzambe alingi,

nakozala lisusu elongo ná bino mpo na *Bilembo Nsambo*, mpe bobele ndenge nalakaki. Nazali mpenza na mposa ya mabondeli na bino. Nazali na bosenga na bino mingi mpenza, na bongo bóbosana kobondela mpo na ngai te. Mpe tika ete nyonso ékende malamau mpo na bino. Mpe nasepelaka mpenza na koya na bino mpe lolenge boyókaki oyo nalobaki na Nsango malamau. Nandimi ete tozali sikoyo kosala mbongwana. Mpe nazali, natondi bino mpo na boboto na bino.

⁶³ Mpe mingi na bino bozokumbáká mituka ntáká ya kilometre na kilometre mpo na koya koyoka moto mpamba lokola ngai komeka koteya Liloba na Nzambe. Nandimisami ete ezalaki eloko moko ya koleka ngai nde boyáka koyóka, mpo ngai nazali na eloko te oyo nakokaki kopesa. Natángá te, nazali na lokumu ya bato te, eloko moko te na ntina na ngai. Bongo ntango namonaka bato kotambwisa mituka kilometre nkama na nkama, kotelema mpe kozela awa, ngonga ya mibale na ntongo, ezalaki te mpo na eloko oyo ngai nazalaki na yango. Ezali Klisto. Nazali na esengo mingi ete bolingaka Ye. Ngai mpe nalingaka Ye. Mpe elongo tolingaka Ye. Mpe lokola tolingaka Ye, tokosengela kokabwana ata moke te. Tokoki kokabwana mpo na mwa ngonga moke awa, wana ntango ezokoba, kasi tokozala elongo lisusu. Ezalaka mposa na ngai makasi bobele ya komeka kokamba bato na esika yango.

⁶⁴ Mpe sikoyo mpo na kobanda mobu ya sika, nalingi koloba te ete: “Mobu Ya Sika Elámu” na bino, nalingi koloba boye na bino: “Nzambe ápambola bino.” Mpe soki Asali yango, yango nde nyonso oyo osengeli na yango mpo na mobu ezali koya. Mpe natii motema ete Akosala yango.

⁶⁵ Mpe nazali, na ngolu na Ye, tokomeka oyo mbula ekoya oyo, soki Ye akobatela ngai, akobatela bino, na ngolu na Ye, nazolikya ete nakozala mkengele malamau mbula ekoya koleka ndenge nazalaki mbula oyo, nazolikya kozala mosali malamau koleka mpo na Klisto. Nakomeka na makasi mpenza komeka kobika pene koleka, kozala sembo koleka, mpo na komema Nsango kaka ndenge Ye ákopesa ngai, nakomema Yango epai na bino na ndenge nakokoka, kobomba eloko moko te oyo Ye akolinga ngai nápesa bino. Nakosala nyonso oyo ngai nayebi. Mpe nayebi ete bozali komiyoka ndenge moko. Bo—bozomiyoka lokola biso nyonso tolingi kosala elongo sikoyo, mpamba te bapole ya mpokwa ezali solo mpenza kolembé, mpe mói ekei kolala mpenza. Mabelé ezali kokóma malili, toyebi yango, na elobeli ya molimo, lingomba ezali kokóma malili mpe kolamukisa esili. Toyebi te eloko nini ekoya na nsima, kasi tokotielá Nzambe motema mpo na yango, ézala ata nini. Mpe sikawa, lokola biso ntango mosusu. . .

⁶⁶ Nalingi bóyeba lisusu ete eyanganelo awa ezali na moko na bakengeli ya monene koleka na mokili, Ndeko Orman Neville, moto ya bulee, moto malamau. Mpe ntango nazali te,

Ndeko Neville nde azali na mokumba mobimba, kaka lokola ntango nakokaki kozala awa. Bayangeli, basungi, mpe bongo na bongo, basengeli kotikala kati na misala na bango kaka ndenge basalaka. Mpe oyo ezali quartier general na biso. Oyo nde esika oyo biso tozali—tozali—tofandi, kaka awa. Billy Paul akozala elongo ná ngai kuna te, bobele se mpo na mayangani, akozala kozonga awa. Mosala mpe nyonso ezali kosalema awa bobele ndenge moko. Kokende kuna, elingi koloba te ete nazotika bino. Nazokende kaka, bosósoli, ezali bobele emononeli. nayebi te soki elingi koloba nini. Natii motema mpe nandimi ete ekozala mpo na bolamu ya Lingomba mobimba. Mpe nayebi ete ekozala malamumu koleka mpo na biso nyonso soki tolandi kokambama na Nkolo. Yango nde nyonso oyo toyebi kosala. Ezali petee te mpo na ngai. Nazoyeba lisusu na ntango moko esengelaki nákende mosika na losambo awa. Baike na bato ya kala bayebi lisusu yango, ndenge nazalaki kokoka kosala yango te! Nalingaka bato.

⁶⁷ Ntango nazalaki elengé mobali, bazalaki kolinga ngai te, moto moko te azalaki komitungisa mpo na ngai ntango nazalaki mwana moke, mpe ngai, ntango namonaki ete moto moko alingaki ngai, na—nazalaki kokanisa: “nakolinga kokufela bango.” Mpe sikawa, lokola moto moko alingaka yo, moto moko amitungisaka. Nazalaki komata na ntango moko na likonzi mpe ekónzo na ngai esélimwaki uta na likonzi ya kala na nzete na sedre, nzokande ekanganeli ezalaki likoló, mpe natutaki yango ná libendé na ngai mpe nabalukaki, nakweaki na mosánda ya metre mitano mpe namikangaki na loboko na ngai. Mwasi moko agángaki, mpe amibetaki-betaki ndenge *wana*. Nalingaka ntango nyoso mwasi yango, amitungisaki. Azalaki moto oyo amitungisaki. Mpe nazalaki kokanisa ntango nyonso: “moto nyonso oyo amitungisaka mpo na ngai, nalingaka bango.”

⁶⁸ Mpe awa, eleki mwa ntango nazalaki kuna na centre ville ya engumba, nazalaki kokanisa mikolo oyo ezaláká kala, mpe makambo oyo Nzambe asili kosala mpo na ngai, mpe nasepelaka mpenza na yango. Mpe natondi bino mpo na bolingo mpe bondeko na bino. Mpe nakomeka ata moke te kokamba bino na libunga. Ekozala ntango nyonso nzela elongobani, na ndenge ya malamumu mpenza oyo ngai nayebi. Mpe bósimba maloba na ngai, natikálá koloba eloko moko te na ntina na ngai moko, ezalaka ntango nyonso Yesu Klisto. Bomoni? Bomoni? Namekaki kotikala bobele pene na Liloba na Ye na ndenge nayebaki kotikala, mpo na kokamba bino mpe kotambwisa bino kino na esika oyo.

⁶⁹ Mpe natiki bino sikawa na maboko ya Ndeko Neville, liboso na maboko na Nzambe, na nsima, na maboko ya Ndeko Neville, mpo na kokengela lingomba mpe kosenzela na libula kino nakokoka kozala na liyangani oyo mpe kozongela bino lisusu. Kotiáká motema ete na ntango wana nakokoka komemela

bino emoniseli monene kouta na Nzambe, oyo ekopesa nsai na motema moko na moko mpe ekokembisa Lingomba na Nzambe.

⁷⁰ Tomesáná kokamata elámbo. Nalingi lisusu koloba mingi te, boyebi ndenge nazomiyoka. Mpe nakanisi loyembo oyo tosengeli koyemba sikoyo, *Kondima Na Ngai Etalaka Epai Na Yo, Yo Mwana-mpate ya Kalvari*. Mpe wana tozali kotelema mpe koyemba yango, tópesana mbote ya loboko, mpe tóloba: “Nzambe ápambola yo.”

Kondima na ngai etali epai na Yo,

⁷¹ Ápambola yo, ndeko na ngai mobali. Nzambe ápambola yo, ndeko mwasi. Nzambe ápambola yo, ndeko mwasi.

Mobikisi . . .

Nzambe ápambola yo, ndeko mobali.

. . . Bonzambe.

Sikoyo . . .

. . . ? . . .

. . . mobimba wa Yo!

Sikawa, tótombola maboko epai na Ye.

Kondima na ngai etali epai na Yo,

Yo Mwana-mpate na Kalvari,

Nzambe Mobikisi;

Sikoyo yoka ngai wana nazalí kobondela,

Longola kokweisama na ngai nyonso,

Oh tika ete banda lelo tika ete banda lelo

Názala mobimba wa Yo!

⁷² “Kino tokokutana!” Tóyémba *Kino Tokokutana Lisusu*. Bisó nyonso sikoyo tóyemba elongo.

Kino tokokutana! kino tokokutana!

Kino tokokutana na makolo na Yesu;

Kino tokokutana!

. . . ? . . .

. . . ázala elongo na bino kino tokokutana lisusu!

Kino tokokutana! kino tokokutana!

Kino tokokutana na makolo na Yesu; (Kino tokokutana!)

Kino tokokutana! kino tokokutana!

Nzambe ázala na bino kino tokokutana lisusu!

Togumba mitó sikoyo.

⁷³ Ndeko Neville, na boye, okolinga te kosukisa liyangani na biso na libondeli? Nzambe ápambola bino.



ETUMBA LIN62-1231
(The Contest)

Liteya ya Ndeko William Marrion Branham oyo, eteyamaki liboso na Anglais mokolo mwa mosala Moko na mpokwa, 31 sanza ya Zomi na mibale, 1962, na Eyanganelo ya Branham na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org